

四庫全書

集部

欽定四庫全書

集部

苑洛集卷六

詳校官庶吉士<sub>臣</sub>李如筠

中書<sub>臣</sub>劉源溥覆勘

總校官原任中允<sub>臣</sub>王燕緒

校對官中書<sub>臣</sub>潘履筠

謄錄監生<sub>臣</sub>胡金芝

欽定四庫全書

苑洛集卷六

明 韓邦奇 撰

叔祖考朴菴府君暨叔祖妣陳孺人合墓墓誌

銘

惟我韓氏世揚武烈肇基有宋邁迹先元鎮于蒲闕封  
茲朝邑至于髯祖志違膚敏守東陵之節樂首陽之薇  
始罷武階齊于編戶我先祖平輔府君不違光德得春

府君乃構首堂惟我高祖府君恭克類惟肖不隕厥問  
惟我曾祖府君整聿將厥家用宏茲貴曾祖生五子長  
我伯祖考府君希孟次我祖考奉政大夫府君顯次我  
叔祖考武清令府君倫次即我叔祖考朴菴府君次我  
叔祖考府君俞朴菴府君靈俊越人芝玉是粹我曾祖  
曰都惟家之慶命之曰英字以世傑爰擇名族卜于媒  
氏媒氏曰都惟陳孺人其德恒一乃召六禮敬戒歸焉乃  
弗弔天毒降災中遭家變我祖考府君方踰弱冠菴

忽捐殞我先君中憲府君紹宗晬未及周呱呱而泣而  
我曾祖乃復倦勤于家集諸祖考分授以事曰希孟汝  
綽而惠其司吾出納庶不召讎言敵于鄉倫汝敏而秀其  
勤于學庶光吾宗英汝謀而紀其行貨于商庶將苟美  
俞汝勤而茂其視我田疇庶有京積怡如威如庭無間  
言故我先君雍容力學臻于大成諸祖考擁翊之功于  
茲宏矣惟我朴菴府君玉立長身沉毅善智既奉我曾  
祖之命遠服賈酌財費修宗族之恩廣鄉閭之義外禮

賓親交納當世貴人而吾韓氏益以大矣又嘗先身解  
阨士之難煮穀活殍人之饑返枉判之田誅不義之僕  
望廬息爭者之訟迎門多長者之車而我朴菴府君令  
聞廣譽蓋于一鄉矣惟我陳叔祖妣貞柔淑慧婦道是  
修妯娌說其恭則孝可知矣臣妾感其惠則慈可知矣  
我朴菴府君行聞既成則其內助可知矣易曰男正乎  
外女正乎內吾韓氏之興不有由哉子男一續宗娶仇  
氏繼孟氏女四長適謝閭次適仇便次適白儒次適賈

宗學孫男六邦憲縣學生娶許氏邦忠國子生娶王氏  
邦樹承差娶趙氏仇所出邦台生員邦望邦本尚幼孟  
所出曾孫邦憲男一仲讓生員聘李氏女二采蘋字生  
員樊藻采繁邦忠男仲謙聘樊氏仲講聘程氏仲誦聘  
孟氏女二采蓮采芹朴菴府君生于正統庚申正月二  
十日卒于嘉靖二年九月二十一日壽八十有四陳叔  
祖妣生于正統己未四月二十五日卒于嘉靖四年七  
月二十五日壽八十有七銘曰維嘉靖乙酉十二月有

金川八十二  
卷六  
六日我叔祖考妣往即幽堂阡于垣中域彼四方裁肪  
切玉佳氣鬱蒼惟吾叔祖考妣之德吾族其將永昌

西河散人墓誌銘

西河散人郭守道自號也散人者散散之人八極之表  
滌落之淵舉萬物莫得而拘焉乾坤不得覆載我日月  
不得照燭我雨露不得霑濡我四時不得寒燠我陰陽  
五行不得化育我究其本真歸諸大源莫容莫破莫得  
而名焉又其次爵祿不能維繫我貨利不能引誘我功



名不能羈絆我寵遇橫逆不能感激我若干仞之鳳萬里之鵬飛翔扶搖于天衢之外人孰得而攀之散之義大矣守道自號也何居考其言論幾于窺次散之意乎守道天資異越曾襟脫落觀其外循循乎若無懷氏葛天氏之民也叩其中其莊南華列玄洞之儔歟郭氏闕之大族祖父以來中衰矣守道裕然自適若無不足者既老猶不長尺寸初里人以守道之能能大郭氏者勸之營產業為妻子計守道曰法聞之斯世羈棲之宅也

夫婦偶合之情也兒女邂逅之恩也吾身性真之主也  
夫羈棲者至暫也性真者至重也偶合之情邂逅之恩  
至輕也夫營全於至暫之寓者愚戕至重以趨至輕者  
惑法弗能智亦安敢愚法弗能哲亦安敢惑法不敢愚  
且惑故不敢勞勞然以傷吾真也有言守道於市者若  
罔聞知人或為之怒曰郭守道何有於豎子耶顧為之  
辱於市守道曰人之所爭者勝也彼詈吾吾固勝矣今  
夫人於羣衆之中曰某德之表也則將欣然而悅之矣

其德之棄也則將忿然而怒之矣彼無故而詈吾於市  
彼德之亡衆所耳目也彼固自詈而頌吾德矣焉用較  
有司兩舉鄉飲皆不就或謂之曰鄉飲禮法之所在也  
深衣幅巾所以示成德也斯固榮名之所在而鄉里之  
所崇矣守道曰誠若此異乎吾之撰夫禮法者性之縲  
紲也巾服者身之桎梏也榮名者人之陷穽也若之何  
而被縲紲荷桎梏自蹈於陷穽之中歟初張居士王伯  
利者闕之善士也中興王氏公納交而崇讓之長老或

謂守道曰郭氏子何崇二氏之深也無乃羨其能而見  
其有乎守道曰然顧法無所利也夫矜不能而妒勝已  
避已嫌而遠善人常情也惟有度者能無妒能不避也  
法焉有度心寔好之矣一日與鄉老泛舟而觴一叟潛  
然泣下守道亦泣焉守道曰吾叟何悲也叟曰吾傷夫  
流水之無盡吾生之易窮也吾始成童吾祖父携吾舟  
於斯固若是之湯湯也吾壯而客於江湖之外幾往而  
幾歸固若是之湯湯也古今之代謝生死之相繼吾如

水何哉守道曰叟過矣夫往者過來者續叟見水之無  
盡也然過者過矣過者未嘗續也焉用悲叟曰子亦何  
悲也守道曰吾見叟之悲而悲之又以見物我之同情  
矣水與吾固一體也又何羨於彼乎正德丁丑十二月  
十一日守道疾革呼諸子曰生寄也死歸也如久客於  
外而得返鄉園樂莫大焉諸子可勿深哀遂卒年八十  
三守道諱子法守道其字也吾朝邑大慶關人配張氏  
子男二長侃起家幾萬金秦府典膳關雖幾千家莫侃

並焉娶趙氏繼娶張氏次爵克佐侃守業娶王氏女一  
適李倫先卒孫男五孫女七侃之子希孟娶潘氏希閔  
聘張氏一適商人樊會一適商人王廷祿一適庠生韓  
邦達一適商人楊鼎爵之子希曾娶衛氏希冉聘王氏  
希顏未聘一適秦府典膳姚本源一適商人何騰一幼  
未字銘曰守道又有言曰地無撮勺之土天無呼吸之  
氣江河巍巍而高泰華滔滔而逝晝昏昏而夜昭昭象  
兩翼而鶴兩齒茫茫宇宙孰生孰死載觀斯言亦散之

旨

茂才趙生仲禮墓誌銘

嗚呼痛哉吾仲禮萬人之傑也今遽已矣夫死生修短  
常理也吾不傷之吾傷夫其志也仲禮不知余之不肖  
也謂行己之學治平之業在茲矣篤信而深依之探其  
志蓋欲凌跨董賈比迹闕閩奮乎百世之下也迺竟不  
售嗚呼痛哉仲禮諱天秩字仲禮世為吾朝邑泊子村  
人父世榮亦從余學母馬孺人仲禮生而靈異幼而端

楷里之士夫父老每曰趙氏兒行不左右顧惟以目視  
鼻未嘗見與人交一言其族祖省試子春謂其天生道  
學不假修習書一過目記憶不忘博通五經子史諸大  
家文章而周易尚書兩經能為舉子業尤精易占六歲  
時世榮遣其兄天叙就師仲禮亦欲往世榮不許乃終  
日不食世榮從遣之每誦讀雖暑夜世榮已起將農穫  
而燈猶未熄每奪其燈令寢焉年十五余歸自晉陽仲  
禮請從遊世榮以其幼恐無受教之地乃涕泣固請來



學時於周易已精且熟余以春秋以來論式示之數日  
後課一題即單襄公論陳亡體也甚奇之自是學愈勤  
無故足不越閩不妄與人談立曰光陰可惜也庚子治  
尚書纔五十日而亦精且熟余乃言之太守兄及紫陽  
諸弟召令誦說終始不訛一字試以義若老於尚書者  
共驚以為神乃謀以族孫女妻之癸卯春鳳泉王公歲  
試即以尚書魁多士余每語諸生古人建立事功多在  
少年如孫策歿時纔二十七他日再言之仲禮曰所遭

之不同也使天秩當其際豈肯令孫權保有江東哉余  
嘆曰此武侯志也是歲秋闈不第歸途次感疾抵家三  
月而卒仲禮靜淵沉毅人莫窺其際余未見漢黃叔度  
當亦不過是也而竟以天歿嗚呼惜哉痛哉仲禮生于  
嘉靖甲申十月十九日卯時卒于嘉靖癸卯十一月二  
十九日未時年纔二十耳事天叙友愛特重天叙亦以  
奇童竝名先卒無子仲禮奉嘗焉初馬孺人數夢兩紫  
龍入室即飛去二子生生而皆天此其徵也配韓氏無

子以堂兄天祐子光業嗣銘曰余嘗觀關中形勝西自崑崙發脉落於三輔長河自西北而南華嶽諸山自西而東會於潼關水口纔丈餘耳關鎖之密結構之巧天下莫並也京兆扶風漢唐來名賢相望而朝邑又氣止之地顧少聞焉意謂必有建功立德之賢待時特起及見吾仲禮謂文武之器將相之業在是矣乃又少折豈渭洛二水界破天心邪且三水皆崩走不常故氣之聚也則賢才生其散也則隨之而歿如吾五泉大夫靈陂

雷子往往皆然可恨哉嗟吁乎紫龍飛兮何日歸兮吾無  
淚可揮兮

傅太宜人墓誌銘

太宜人卒子武庫大夫學禮余同鄉友也往吊焉學禮  
哀麻哀泣稽顙請銘初武庫居諫垣弗能緣時俯仰左  
遷當外補以太宜人年高將力田侍養終身焉伏里舍  
已七越歲屬洪洋趙公撫陝武庫舊僚也因勸駕而武  
庫有難色太宜人覺之曰吾兒之不出以我故邪我尚

健能隨汝養武庫奉命服官政比遷武庫郎中而太宜人日思少女武庫急欲告歸而繫籍于公不得遂時相知者又以武庫資當叙遷可使道侍歸武庫朝夕以是慰太宜人太宜人亦雅欲見武庫遷也時吏部方擬武庫補方面而選司以武庫內艱員缺告乃相與歎惜云太宜人姓王氏陝西慶陽之真寧著姓清江提舉司提舉公諱道之女贈奉政大夫兵部武庫司郎中傑公之配也聰惠貞靜甫八歲授以內訓諸篇輒領悟提舉公特

受之提舉公官清江時翁諱得才以將仕階官南都贈公隨侍豪俊有遠志遂合二家之好云贈公既大度不事家人生業而又廩于庠肆力于學太宜人濟以勤儉故家不告匱及贈公擯于提學益養浩頤真超然自得

有遺世之志凡家政小大咸太宜人綜理姑李孺人臥病十餘年侍奉周旋順適無方孺人忘其苦云將仕公李孺人相繼歿襄事皆倚辦太宜人故當時人稱贈公之行飄然若忘機者本太宜人內助之德也初武庫幼

時贈公謂太宜人曰是兒性格難馴與其過懲而傷莫若預導之教乃命出就外傳入則太宜人示之以禮夜則口授以句讀又親札影本以課倣書武庫君學既通乃脫簪珥為束修以就明師及武庫中式鄉試登進士入仕籍而太宜人又善節理生事家稍裕即留意於周貧濟急云女工中饋事事精鑿尤謹內外非至親未嘗接面自為父為母為姑未嘗一日或怠贈公既捐館舍武庫勸其勿親家政願養天年惟女工則未嘗暫衰曰

我有所事事則心安而樂不以為勞也太宜人  
生於成化十二年八月二十二日卒於嘉靖二十五年八月二  
十一日享年七十有一子男一即武庫娶黃氏贈宜人  
繼駱氏孫男一女四武庫扶柩歸將安葬於贈公之原  
銘曰毋以成子為慈非煦煦吁吁之謂也太宜人於武  
庫也始教之學終命之仕而武庫生得榮祿養病得侍  
湯藥沒得奉治命可謂孝矣皆太宜人成之若其他內  
則懿行固女德之恒也維嘉靖丙午朔吉武庫奉太宜



人之柩歸於慶之陽爰啓贈公之壙乃窆而藏鬱草茂  
林有崇其崗玄垂朱翔長發其祥

南京刑科給事中首山史公墓誌銘

首山子道豐而位儉體達而用阻志士至今心惻昔首  
山子官南都居諫垣也竭節致忠伸志就列侃侃然彈  
射勿畏高明巧中者指宗室傷之而首山子罷蓋正德  
中也比及天日既朗心跡已白而首山子病天下知首  
山子者日望其愈而興者衆矣乃留連二十餘年而竟

不起天於首山子何饒於賦而靳於施邪嗚呼賈生屈  
于長沙仲淹老于河汾從古則然哉公姓史氏諱魯字  
宗道號首山子山西平陽蒲之大族也曾祖諱仲謙祖  
諱全義官考諱臣南陽府經歷封給事中妣馮氏封孺  
人公幼聰悟初授書讀聲朗朗即通曉大義顧莊雅不  
同羣兒好學不倦雖暑夜且就燈火學既成章而尤精  
舉子業弘治戊午以尚書魁鄉多士入太學祭酒方石  
謝公校六館士而公為監元曰與監元者性理之學也

正德戊辰登進士授鎮江府推官時羣閹擅政上下交  
征吏治多苟且公治其尤者數人而一郡肅清江東訟  
者皆願之公曰史青天也然又決之寃之獄而人祀其  
惠寢懷金之謝而衆服其廉裂大宰之刺而人莫干  
以私三年而政成頌興當道交章論薦之曰循良吏也乃  
擢給事中比當權瑾之後言路久塞公乃以諫議為已  
任彈射皆當世貴人蓋自吏部尚書而下二十餘人既  
而又劾叅贊司馬及守備太監曰表裏擅權淫朋也寧

藩宸濠逆節已萌人皆知之然濠權術巧中嬰之者奇禍立至又以離間典重在省在廷無敢言者公乃首發其奸曰濠必為變無疑也又上疏請省國用以節民財蓋前後二十餘章劉駕部讀之曰此切當世之務俊傑之見也會師臣不合於幸寧寧嗾稔奸枉狀訐師臣守備太監素善稔奸因募公名于狀曰給事中師臣門下士也遂罷歸公素敦孝友事封公孺人終身仁若孺人卒卧地枕塊感疾風濕痿痺幾傷生處其弟知縣君周

情回憂喜人以為難乃又艱闕脫封公之難南都極迎  
養之懽生則構堂而奉沒則建祠而祀嘗誨諸子曰孝  
弟者仁之本也未嘗刻意為詩文然自典則爾雅絕腐  
脫俗所著有首山集曰學務自得文藝末也為人坦夷  
平易弘人之度素優終身未嘗與人有睚眦絕口不言  
人短不較人惡高知州淪貪狼悖德尋常視公及事敗  
士民盡欲害之園圍其第公問遺如常淪祈曰知州罪  
則滔天矣奈妻子何惟仁人是望公允其託圖全歸之

或以為過厚曰犯而不校學者所當師也與人恭雖卑  
賤亦為抗禮曰均是人也初公既里居閉門掃軌不事  
請謁惟與諸生商確義理校勘古今為物我進修之圖  
公素不營產業凡俸薪又不入私室歲少歛妻子不免  
饑寒或鬻田圃具粗糲充腸而已然未嘗有所怨故蒲  
人曰貞庵之後惟公一人貞庵者蒲產楊少叅也清介  
慎取與蒲人重之君子曰首山子可謂安貧樂道者也  
公生於成化癸巳八月二十七日卒于嘉靖己亥五月

二十七日享年六十七歲配王氏封孺人先公卒繼吳氏齊氏子男四長資治州學生先卒娶李氏資教鄉進士娶馮氏繼姬氏次資化州學生娶李氏資世聘王氏女六長適王尚忠次適王元從次適庠生楊鏞次適庠生傅弘烈次適范學誥次字許敬孫男五女六曾孫女一資教等將以庚子十二月二十五日與王孺人合葬於東原程胡莊之兆資教持狀來問銘銘曰經有之天道福善禍淫首山給舍國士也當其給舍時彈射無所

顧忌可謂忠且直矣窮其蘊抱豈歟於古之經世君子  
哉乃未及五十而病病二十年而沒位不過郎官福不  
繼於廩祿天果不可諶與首山之子粹美宏碩有首山  
風殆將興乎經有之積善餘慶天之福首山其慶在嗣  
邪然則首山未為不伸也首山之陽青青者薇有斐美  
人終以之歸高原膺膺隴佳者庚魏魏馬鬣上有薇生

張雲霄墓誌銘

正德己卯四月三日雲霄以瘡卒年五十一卒之一日



弔者下人焉哭皆盡哀出皆嘆息皆謂雲霄善士也其疾若斯其年若斯人又烏用為善哉嗚呼其為人可知矣雲霄諱鳳字雲霄世為朝邑大慶關人自祖父來以貲雄于關皆素食修讓好施樂德鄉里稱積善之家必與張氏云父貞齋諱質配郭氏繼配辛氏許氏俱先貞齋卒郭氏生雲霄張氏至貞齋尤克光大其世弘治乙丑貞齋卒張氏燬於盜貲產幾盡焚歿者數人雲霄早年個僮任放不事家人生業貞齋既歿又遭家中衰

內乏兄弟外鮮宗親乃痛自刻厲盡反舊好不數年家  
至幾萬金於是睦鄉黨禮親友交納達官貴人張氏又  
大振云雲霄性溫雅終身未嘗與人競人見者皆愛重  
之配褚氏先雲霄卒繼配劉氏子男二梧娶蕭氏栢尚  
幼女二一聘韓仲祥一聘王義皆劉所生也雲霄疾為  
左搭肩瘡百餘孔狀如蜂絡治法宜托裏表外清火散  
毒乃不三日醫顧針破之令兩人力擁瘡鮮血迸出腫  
應手而起瘡遂大發勢固已危迫又一醫連用牽牛巴

豆諸劑利數日而血氣大憊瘡遂內潰不可為矣蓋二  
醫者本市井游惰素不通方脉偶隨方外士得一二偏  
方鄉里小疾幸得効彼遂自以為能而至此也先是三  
月十日雲霄來會時尚無恙余告之曰觀雲霄之色惘  
而怠枯而鮮華疾將作矣歸且慎之雲霄謂陰上舍曰  
我尚善飯韓公謂何既而復曰往年韓公謂郭景華景  
華病月餘今又謂我其殆哉居五日而疾作又十餘  
日遂至大故使雲霄因余言即藥於未病既發即求良

醫付之遽至此哉可哀也已故因誌雲霄並書此以為  
謹疾而命醫者之戒書曰天降威罔非惟酒究其極莫  
非命也夫梧將以是月二十二日葬雲霄於關之西原  
來問銘銘曰張氏世善之家也雲霄善士也而所遭若  
此人所憾於天地固如此邪或曰季世之天災祥固難  
謀矣非邪是邪伯道無後諸曹皆賢幽遠難知有憾也  
天惟此令名千載有傳

處士一菴尚公暨配郭孺人王孺人合葬墓

誌銘

公卒子道余門墻友也捧同邑趙殿試九經狀來問銘  
公諱秉彛字天性姓尚氏別號一卷山西平陽府夏縣  
師村里人也曾祖考諱達祖考諱宣父諱釗母孫孺人  
公幼即敦朴不為欺誑及長見尚氏中哀也嗣爾股肱  
幹盡用譽家以大饒曰不理其家非孝也人而不孝非  
子也弗孝弗子吾懼之矣吾自食其力豈望而罔之者  
哉公又以興家莫大於教子命道習舉子業督責之嚴

獎掖之愛恩慈義方兩盡之正德丁丑謂道曰爾裒然  
儒華之中而弗能秀也而又弗克於農也其將若之何  
吾聞苑洛子者授生徒於河西爾往從之苑洛子為蔡  
沈尚書傳義二十卷俾道誦習焉嘉靖丙申過例冠帶  
復其家一人有司舉鄉飲固辭不就曰冠帶恩詔也以  
壽吾年八十吾安焉鄉飲大典也以德吾何以堪之壽  
而靡德古謂之辱不亦羞典矣乎人益與其質公年九  
十殿試往候之至其家僮僕訢訢子姓肅肅公雙目炯

然辭氣雍雍步不用杖坐不傾欹雅若儒適若僊殿試  
曰斯翁也非中畜而外發者乎春秋名卿賢大夫視其  
國君諸侯容貌辭氣吉凶卒不爽即公容止公之福壽命  
定於天者固多而德將於人者不可誣也公雖敦本不  
求人知闇然日章自莫能掩云公生於天順二年正月  
十二日卒於嘉靖二十八年十月初七日享年九十三  
歲配郭孺人先公卒無出繼配王孺人閒閒靜女克慎  
中饋事翁姑處妯娌教子婦撫僮僕上下無間言也生

於天順八年五月初十日卒於嘉靖二十八年十二月十八日享年八十六歲夫婦皆享高壽偕老同年而卒亦世之鮮見者也子男一即道以尚書應貢入國學娶田氏繼娶韓氏繼娶鄭氏女二長適解輔次適韓哲孫男三長惟勤業農娶盧氏次惟肖業儒娶盧氏次惟馨幼女三曾孫男一篤女二道將以是年十一月十三日合葬公及郭孺人王孺人於村北新阡之兆銘曰內有善外日彰生有善沒則揚公雖闇然有銘章夫婦壽同



年亡埋玉處鬱葱蒼垣裁平取公幽堂

監察御史楊公墓誌銘

公諱本深字季淵號西村陝之延安膚施縣人也楊氏  
之先本廬州府人曾祖順隨高伯祖武德將軍旺戩關  
中為西安官籍後順游延安覽山川壯偉愛之徙膚施  
祖春父威蜀府教授贈奉政大夫南京戶部郎中母白  
氏贈宜人以公兄本源貴也公七歲入小學弱冠充府  
學生有文名癸酉以書經魁鄉薦試南宮聞贈公之變

奔喪歸未幾宜人繼卒公自贈公宜人始卒及虞祔祥禫皆以禮每南宮不第輒闔戶讀書曰人事未盡也足不履市肆公門乃竟弗第曰命矣乎癸巳謁選吏部授湖廣荊州府推官苦節砥行淡泊無異儒生凡訟至庭數言即允兩造俱服然後平反數四恐懦者不得盡其情也石首奸民佐貪令肆虐歲復饑饉民囂然不寧公往署邑事撫賑之捕奸民抵法四境寧肅後新令至歸民遮道泣留一邑傾動時土夷叛兵備鄭君氣命公往

撫至則名其酋長宣布朝廷威德諭以順逆禍福羣夷  
聽命他如釋陳顯華之枉破王允節之奸士民至今誦  
說嘉靖戊戌考績北上屬官贖魄者不閱封却之太守  
李公笑謂公曰楊公畏四知耶故荆人數清白吏謂鮮  
與公為儷者已亥擢貴州道監察御史庚子奉命巡視  
京通倉儲去奸剔蠹夙弊頓革凡運領不法者論治之  
辛丑敵大犯山西公條陳設伏禦敵方畧乃論劾總撫  
大臣毀櫃之罪上嘉納之是歲巡按山東見東人勞瘁

不忍峻治雖憲體甚嚴每以慈惠行之故所歷郡縣民皆安堵不擾若無顯貴人臨者惟貪吏則不少假借也壬寅得敵諜者云賊欲掠臨清臨清天下水陸之衝財貨所聚也乃與都御史曾公會議築羅城是役也有生人之道民亦子來不日即工事聞命銓部候擢京寺仍有白金文幣之錫甲辰再按畿輔是秋敵犯紫荆公會撫鎮請命調軍分布關要敵掠完縣而去乙巳刷卷京畿道蓋御史之極選也非資深望重不得與乃丙午四

月二十四日庚戌無疾正衣冠危坐而逝公友愛誠朴  
季弟本潔孤弱撫育成立本潔又卒遺孤甫七歲復撫  
育之愈於己子姊適董氏夫亡家貧二子飄泊迎之任  
奉養焉自生員至末世廉潔自持取與不苟世俗紛華  
亦無所好嘗笑言動必慎矩度宴居獨處如對賓客凡  
接人待物退焉謙抑居官所至問民疾苦不設方畛若  
和樂易與者然持法嚴肅人不可犯云銓部將錄公功  
而超遷之而公逝矣公生於成化丁未三月二十六日

距卒享年六十歲配甄氏贈孺人繼配忽氏太守忠之  
長女封孺人子男二長吉府庠生粹美可成立娶劉氏  
次兆府庠生娶劉氏女三長字岳某次字恩生馬某次  
字艾某孫男一女二尚幼吉奉公之柩歸里將卜日以  
葬以公友兵部郎中傅君狀來問銘銘曰惟士之廉以  
端百行惟官之廉以立百政抑抑監察冰玉自持爾吏  
一貪百惡從之一夫橫行萬民何罪非故爾言實妨我  
惠行憲之風佐府之仁威德時出庶幾斯人

大梁驛驛丞張君墓誌銘

君諱繼宗字述之姓張氏華陰大員里人祖微以詩經  
中鄉試授山西興縣儒學訓導封奉政大夫工部都水  
司郎中祖母陳氏贈宜人父壽剛稜善執彊直不隨以  
禮記中鄉試初太原為晉故地秦郡縣天下公子王孫  
皆為編戶而長吏顧其故民心忿不平其俗剛勁勇敢  
好謀善傾而三晉公族又多至西漢時猶訐告至二千  
石太原屬邑固皆難治而榆次悍訐特甚其人任俠使

氣好勝恥屈長吏稍不平即羣聚而排之有陷其身家者不特罷官而已雖銓司亦以為憂壽侯銓京邸舍時榆次令缺同舍生榆人也謂壽曰舍長可吾邑令既而果令榆次同舍生設酒饌候賀壽至大怒曰我為榆次令生為榆次人乃敢浸潤我令家人拉之地壽手杖之即徙居他舍治裝令家人荷兩担壽杖而步至保定榆次丞遣夫騎迎壽壽杖却之至榆次申丞不當起夫騎迎令坐之法既視事獲殺人盜贓仗既明堂階左掘一



坑埋盜至肩大挺碎其首死擁土為墳又有不孝子母  
告之供實令不孝子買一棺來立柱殺之埋堂階右亦  
為墳左右累累相對曰張知縣不用大明律其法如此  
自是嚴刑峻法有犯痛治之不少假借榆民股慄饕殮  
惡草九年一節成化二十二年行取自是榆次始可治  
初榆次羣俠苦壽束縛不敢肆百計搜羅無所得成化  
庚子鄉試檄壽外簾羣俠於赴省必由之途設謀陷之  
求貌類壽者偽曰知縣與馬傘蓋夫隸柴戟皆如知縣

前驅者一人至他縣大家謂主人曰今日榆次縣主至  
可得密室為館主人素聞壽名盛饌以候前驅密曰縣  
主久清苦今乘此差欲假數日娛樂可備一歌者既而  
知縣至主人侍飲至更初從容謂知縣曰某有家樂暫  
令侑觴知縣笑曰勿令人知會一人走入擲白金十兩  
於地曰賞樂趨出知縣追問何人其人遠跪不前曰某  
里長也急起去知縣笑曰刁弟子明日知縣去主人不  
知其偽也適壽受巡按檄勘事他邑由他途入省久之

俠告里長科銀里長初故不服刑乃言官問科銀何用  
曰知縣賞樂婦耳按察使疑之又以壽入省未經此途  
計得其偽狀事乃白俠首捶死窮治其黨壽至京授工  
部主事歷員外郎郎中工部事涉內府權貴人多干請  
有權貴人不知壽也託壽為攬頭地壽對使者大罵手  
裂其帖曰今番且將就再來者我早朝面奏天子自是  
無敢請託者人以壽刑人之狀呼為張扯鑽名聞孝皇  
一日上幸後山壽巡視皇城刑人大內聲徹御座上問

之左右以張郎中刑人對上笑曰從渠扯鑽中使或謂  
壽曰上在後山壽大叫曰今日是何節令幸此何為中  
使驚走郎中六年不調致仕歸母詹氏封宜人君美髯  
長身喜修容儀由承差授大梁驛丞大梁為天下要衝  
河南行省平章且建治大梁百司分列行旅輻輳前後  
丞往往弗稱使任多罷去驛丞獨無所違失於是遠近  
多稱說驛丞者汴有黠盜流劫郡縣主盜司弗能禁官  
民以為憂道使者言於都院使院使曰吾察羣吏獨張

驛丞勇敢多智可屬盜事乃有檄檄驛丞果捕獲之又  
數數得偽印兩院大喜共表薦驛丞能九年致仕歸守  
臣使得乘傳入關寵異之嘉靖戊子歲大饑君戒家人  
勿得徵羣逋曰此周負之時也一婦亡金釵君之野獲  
之亡釵婦覺亡返哭於道君呼婦與釵人稱惠義云君  
生于景泰乙亥十一月二十六日卒於嘉靖己丑十月  
二十四日享年七十有五配邊氏子男四長璿生員娶  
陳氏次璣娶王氏次玉娶石氏璣玉俱太學生次衡承

差娶楊氏女六長適叙州府知府趙儒次適生員馮時  
欽次適朝邑縣生員李聘次適王廷新次適生員史廷  
謨次適承差潘錡孫男八女八將以今年十一月二十  
八日葬于城東南祖塋之次來問銘銘曰人言華陰張  
丞家居三十年豈直閭里畏服前後華陰尹崇敬之禮  
如顯人不與他丞等是必有以致之矣人固貴自立非  
以爵與位言也亦即中公遺澤之未斬歟

登仕郎臨汾縣主簿幽齋雷君暨配劉氏合葬墓

誌銘

君余同舍友也資容秀美性質溫雅語言進止循循然  
謙抑而中節與李明經聘相友善同舍生皆以遠大期  
之亦甚愛且重焉君諱復亨字自坤號幽齋西安同之  
朝邑縣西關人也高祖昇昇生曇曇生時時生霓鄉試  
中式歷官淮安通判配聶氏生君年弱冠補縣學生歷  
試秋闈不第正德中授列入國學國學生亦皆愛重君嘉  
靖四年授山西臨汾縣主簿治易州廠事廠司厚利前

後官皆罪罷君日夜兢惕翼翼供職三年還治臨汾時  
境內盜黃鍾等劫掠居民聚散無常遠近騷動君設法  
捕之藩臬知君能檄君主盜事盡擒獲藩臬下牲幣獎  
勵邑東有高橋年久塌損行旅病涉君修復之邑人立  
石紀其功佐縣事三四年間臨汾人甚安使之而君不  
能媚上官乃罷歸歸之日民哭送之既家食亦惟事田  
園安日用之常耳配劉氏幽閒有婦德繼娶徐氏尤為  
貞淑十五年來事君如賓君病篤焚香誓天願守恒一



及君卒喪祭大事皆其經營也君生於成化十四年五月二十三日卒于嘉靖十五年正月十九日享年五十九歲劉孺人生於成化十八年九月二十一日卒于嘉靖元年七月初一日享年四十一歲子男三長儒生先卒次汝震以侍君疾亦得疾君服未闋亦卒娶魏氏次汝化聘劉氏皆劉出孫男一子魯將以是年九月二十九日合葬于新塋來問銘銘曰君雖不究於科目文則斐然位雖卑而守職則惟汝賢追昔好而志此期後世

之有傳

純齋處士楊公墓誌銘

楊氏之先本華陰人元亂徙朝邑街子里至處士蓋七  
葉矣而徙祖名字無傳祖耀贈衛經歷祖妣曹氏封太  
孺人父寅應歲薦為富峪衛經歷三考署上上授徵仕  
郎陞四川嘉定州同知母李孺人處士名錦字尚綱號  
純齋性誠篤喜恬靜見顯貴人若里之惡少謹避去曰  
物有所弗合也志有所弗樂也軒然負氣之人孰能為

之應哉與物無忤自童及老未嘗至訟庭曰忤則爭爭則訟君子胡爭也鄉鄰有鬪若將浼焉或強質之則為之判白兩爭皆允曰擾擾焉非居身之珍也昧昧焉非直諒之道也如斯可也有某氏兄弟相惡枉狀其姪死罪羣輩皆擠之潛賂處士請共証焉處士弗許曰夫子欲之而以命錦人急之謂何欲因以為利有如天道矣初徵仕宦富峪與嘉定也道路險遠曹太孺人老弗克從處士事之謹曰傷哉吾父之志王事靡盬不遑將母

也撫教二子甚嚴少有拂經即正色弗與言二子謝過始解曰吾懼夫嘻嘻之吝霜凝則日烈楊氏立於斯楊氏毀於斯二子其圖之事其兄隆友其弟訓導縉驛丞夔怡怡然終身不衰曰是帝之明也鞠之哀也敢弗敦與御羣僕嚴而有恩曰是亦人子也饑寒休苦弗與人同情哉處士生于天順二年七月十四日卒于嘉靖八年十一月二十四日享年七十有一配劉氏子男二長時雍省祭官文而矩容儀彬彬搢紳之流也娶王氏次

時禮壬午舉人粹而立雅而一經明而行舉其將大楊氏者哉娶孟氏繼娶仇氏陳氏女一適本村馬居全孫男二曰瓊曰瑤孫女四一字嚴氏一字屈氏一字賈氏一幼時雍兄弟將以明年二月十一日葬處士於陽昌村祖塋左之新兆來問銘銘曰吾友程君範言處士天資甚美言行多暗合論其世信然程君又言嘗觀華陰楊氏之族譜謂楊氏漢太尉震之後世次甚詳謂渭北有十七房處士族蓋其一乎楊氏之源遠矣

光祿寺良醞署署丞李公暨配東孺人合葬墓誌

銘

公諱宗禮字天節姓李氏陝西西安府同州朝邑縣嚴伯村人也父政以公官贈光祿寺良醞署署丞母常氏贈孺人叔諱本御用監太監英皇時賜蟒衣玉帶歷憲孝武三朝皆蒙眷遇奏公為嗣公幼習舉子業弱冠選充縣學生鄉試不第援例入國學司禮監歷事附選給假歸累入鄉試不第謁選吏部授鴻臚寺序班朝儀閑

習無差尺寸武皇登極公充正使捧詔之雲南公通敏  
善文人堂官同僚多為延譽序班六年餘選部將擬陞  
知縣公雅不欲出尋陞光祿寺典簿廳錄事公大家故  
克慎取與廳事又皆理堂官薦之部陞本寺良醞署署  
丞三年考績父母獲贈焉御用公年八十餘乞致仕孝  
皇遣中使送歸私第公事之甚謹御用公喜愛之呼為  
四哥而不名御用公卒公營葬事禮儀極其觀美守制  
三年蕭單二嫂浮坵於都城西門外公擇地葬之初御

用公期公必登科目公思承其志聞明師益友必趨講席每應試偕同憲友行路費飲食皆公自備既入仕招延賓客鄉士大夫有慶餞禮必主之公雖西山之遠必輟公事往從云公生于成化丙戌三月十三日卒于嘉靖甲申八月十九日享年五十九歲配東氏亦以公官封孺人東氏故大家孺人父俊又善經理家事遂以貴雄孺人生于成化己丑十二月二十一日卒于嘉靖壬辰正月初二日享年六十三歲子男三長德源援例授



府照磨娶韓春桂吾妹也皆先孺人卒側室張氏無子  
以族子守稱嗣次德澄錦衣冠帶總旗娶夔州府知府  
劉公孫女皆先孺人卒繼娶王氏側室京張氏無子以  
堂姪慶祺嗣次德滋先孺人卒娶都轉鹽運司運使華州  
東公女女一適邑庠生王廷祐孫男一即守稱娶東氏  
慶祺娶蕭氏女年十四貞烈飲毒死京張出京張者京  
師人也夫亡年少尚書苑洛為之傳曰將不詳書其事  
烈女之心無考也將詳書耶甚非烈女之志也推烈女

之心寧無書焉庶烈女之心慰矣古今烈女多矣事之  
難處情之難決如烈女則古今所無也嗚呼傷哉吾之  
為此一字萬涕矣守稱將以是年十月初十日合葬公  
及東孺人于祖塋之右來問銘銘曰吾每思公家事嘆  
惜而求其故不能得也公善士也平生無作一傷害事  
未嘗有傾擠心公卒時子孫濟濟比孺人卒皆殞滅無  
存苑洛乃拂衆情而立守稱然後援例而立慶祺不然  
公已矣因以銘之庶後之君子思而得其理焉

處士權公暨配党孺人合葬墓誌銘

公卒子朝卿余門墻友也捧吾友王殿試一治狀請誌  
銘公諱景魁字時仰號質菴姓權氏世為吾朝邑人先  
居江家社遷許村後遷八里莊高祖諱秉中曾祖諱士  
祖諱福父諱祥世皆務本食力母王孺人初權氏以貴  
雄朝邑後稍衰焉公甫弱冠祥公知公之能立也以家  
政付之公振奮而起不數年權氏復中興八里莊言富  
族必列權氏公剛稜豪宕里人咸畏服有不當公意者

輒示以聲色即其人惶恐不自安必悅公而後已里有  
爭訟必質公既判定無能違者然見人有貧困患難必  
思周援公嘗曰有親者不可不知醫方書本草不離左  
右親病自擇藥餌將進必親嘗莊雖數百家俗競藝黍  
稷遠服賈鮮修文學公獨教朝卿業儒卒以成立暮年  
有司延為鄉飲賓一預後辭不至曰吾安能以高年僕  
僕於樽俎之間哉公性勤儉家雖完美且自抱甕視汲  
量入為用曰成之不易保之惟艱也殿試又引吾友廣

文劉公巖之言謂公雖不試典籍而質美暗合若高陵  
大川巖未嘗登其麓涉其波安能測其中之有哉廣文  
論篤人也其言足徵云公生于成化壬辰十二月初三  
日卒于嘉靖庚戌十一月二十六日享年七十九歲孺  
人姓党氏亦本邑營田莊名族父澤母史孺人孺人工  
針刺務績紡納酒醬以供祀事事烹飪以待賓客奉翁  
姑孝處妯娌和教朝進等慈而不溺權氏中興孺人有  
力焉殿試曰女德婦道母儀皆無缺焉生于成化戊子

七月十七日卒于嘉靖庚戌二月二十四日享年八十  
有三子男三長朝用掾士早卒娶張氏次朝進娶麻氏  
次即朝卿廩膳生員累應秋試娶張氏女三長適周銘  
次適高寸心次適高守己孫男四濟經娶王氏寓經聘  
党氏建經未聘明經未聘女二俱未字朝進等將以明  
年辛亥二月二十四日合葬公暨孺人于先塋之次銘  
曰權氏名族世以貲雄既而中哀振起于公公行侃侃  
剛稜豪宕莊數百室誰敢不讓謂孝在醫從事岐黃親

當有疾湯藥親嘗衆逐末利我敦文教彬彬朝卿邁迹  
儒校幽閒靜女君子是速母儀克盡婦道孔修酒醬烹  
飪針刺紡績權氏中興孺人有力歲當庚戌同年而歸  
偕老齊眉世之所稀

處士任君墓誌銘

余為諸生時君亦充華陰學生因識君於庠舍又十餘  
年而君就隱德又三十年而君卒矣四十年間忽忽如  
昨日嗚呼傷哉初君遣其子今舉人代伯來就學且曰

昔嘗聽朝邑韓先生說易明且盡令人恍然有悟我心  
慕之汝往從遊焉至是代伯持狀來問銘君諱傑字漢  
臣世為華州人高祖真避元亂來遷居華山之西甕峪  
口再遷於東里村遂家焉真生士中士中生壽官昉昉  
生耆老鏜鏜配袁氏生君資性秀敏年十一選充生員  
弱冠能詩文善楷書三十而名弗耀嘆曰儒冠誤人一  
至此矣吾安能鬱鬱與人較藝終身哉遂告歸里舍然  
誦讀書史終身不怠暇則於居前隙地射鵠為游息或



邀里之善士從容談飲娛樂焉君有雅度性惻隱有宰  
事才一男子投君就役後盜叔氏金誣君寄藏也君易  
產償後盜金事白衆喜趨告君亦卒不自明人曰此今  
之直不疑也里有死不能葬者君出貲以助不足則請  
同志共襄其事人曰此今之范麥舟也里有斂散衆必  
歸君則甚平人曰此今之陳孺子也嘗謂代伯曰讀書  
以四書五經性理子史為要文以典實潔暢為美泛博  
浮逞無益也有司知君累請為鄉飲賓不就壬寅冬感

疾癸卯春復起夏疾再作卒君生於成化戊戌七月初七日卒於嘉靖癸卯六月二十一日享年六十有六配李孺人先君卒代伯自為之銘納之幽壙云子男四進忠娶王氏進孝娶張氏出承堂叔生員朝嗣代伯娶牛氏繼丁氏甲午舉人代宦娶袁氏生員女三長適王道次適史吉次未笄孫男五簡娶楊氏篋聘史氏笠管竒俱未聘女七長適承差石汝靜次字史權餘未字曾孫一攘兒進忠等將以本年十一月二十日開母壙合葬

焉銘曰厚其積不獲其伸慶弗於其履於其嗣人晦其  
名利王賀之貞永終吉鬱鬱佳城

席君墓誌銘

蒲士秦子克明謁余曰吾蒲有百口同居者席君銘也  
克明義之今既卒矣敢以狀聞左右夫秦晉之俗敝也  
久矣父母尚存兄弟異產而席君豈易得哉可以銘矣  
君諱銘字克新姓席氏號玉臺山西平陽府某縣東靳  
里人也遠祖國初戍蒲州守禦千戶所有諱清者始顯

名配陳氏生秉德配張氏生魁配樊氏生貴配郭氏生  
祥號竹村配賈氏生君君幼時學舉子業不成又不喜  
農耕曰丈夫苟不能立功名于世抑豈為汗粒之偶不  
能樹基業于家哉于是歷吳越遊楚魏泛江湖懋遷居  
積起家巨萬金而蒲稱大家必曰南席云自是崇義讓  
惇宗族睦鄰里親友賑貧恤乏解紛息訟成人之美納  
交當世君子雖蒲之州大夫所將軍不以行伍衆庶待  
之而席氏之家聲益振孝于親刑于室友于兄弟義以

訓子姪故今百口同爨無間言無二志臧獲盈庭亦無  
爭者既老以家事付子日與一二知契杖履山水間優  
遊閒雅風度若儒士有司乃延為鄉飲賓初正德中君  
蓋以竹村之命援例冠帶云君生于成化十七年正月  
二十九日午時卒于嘉靖二十一年四月二十七日戊  
時享年六十有三配張氏子一遇春國子生娶張氏繼  
史氏女六長適文深次適梁志高吳剛王粹俱商人羅  
鳳梧郭嵐俱州學生孫男二長東聘賈氏次上遇春卜

以是年九月葬君于城東石莊村新阡之兆銘曰昔淮  
陰資身無策敵人輕之馬援自示其能千金散而復積  
然則從事于貨殖之疇者非特以利裕也銘亦州閭之  
雄傑也哉至于百口同居可謂好禮矣

外孫廩膳生南陽張士榮墓誌銘

吾尚忍銘吾孫哉舉筆輒肝腸寸裂然吾孫隱而未見  
蓄而未泄孰能詳哉古人謂一字一涕吾為是銘一字  
千涕且萬涕矣吾孫姓張氏諱士榮字仁亨號南陽世

為關內馮翊朝邑陽村人後其父徙寺後社南陽者吾里名也吾孫生于南陽長于南陽學于南陽且置莊于南陽將卜築焉未卒前五十日病亟其母始携之歸寺後然朝夕猶取南陽水飲食之蓋自落地至歸真皆南陽也號南陽者不忘南陽也不忘南陽不忘吾也死者有知神其在南陽乎此吾所以哀痛之無已也吾豈不達死生之故哉高祖諱藝配雷氏曾祖諱軌配王氏祖諱瀚配蕭氏父騰蛟累應秋試充歲貢母吾女外祖吾

叅贊機務尚書外祖母張淑人吾孫幼有至性三歲時見庭前舞者屏後側身效之見吾拊琴歸以兩手作勢告其母命命如此吾聞之嘆曰此孟母所以三遷也九歲時讀尚書至璿璣玉衡章蔡傳引張衡渾天儀說吾曰此書舉子多不讀吾孫曰安有書而不讀者乎吾授之明日再授不肯過吾恐其幼不能悟命姑讀過泣三日曰我不知如何過吾試告之吾孫即以竹篋葦筒為一儀象以呈吾大奇之以是知前此所讀書皆知其義



矣十三四時即暢達三場文字侍吾遠宦於外不及就秋  
試嘉靖己亥年十七提學龔笑齋取應秋試乙巳吾在吏  
部問吾孫致太平之道對曰今之舉子業與前代不同五  
經四書傳註皆祖宗之制律例者國之成憲今庠序之士  
為文不詳傳註郡縣之吏治獄不依律例昔周王訓官  
曰其爾典常作之師祖宗制度尚違越如此況望其學  
古議事者乎欲致太平必先正此二者蓋致天下之治  
者在郡縣之吏而他日為吏者皆庠序之士也吾與一

厚僚贊美一大臣吾孫於屏後聽之容去謂吾曰適聞  
所論兒殊未喻大臣與言官不同言官遇有朝廷缺失  
即當言大臣審其必能見納然後可言若明知其不能  
行身徒殛竄自取虛名使朝廷添一過舉四海加一瘡  
痍非大臣忠愛之實也吾曰然則如之何孫曰以道事  
君不可則止吾他日以二事告契僚大驚曰此豈尋常  
舉子之見哉丙午吾淑人病孫朝夕侍湯藥吾命應秋  
試不肯行屢促之不從吾怒治裝縵嚴遣之明日孫跪

曰兒今陳情吾曰陳何情孫曰祖母病矣而欲從事於功名得失孰輕孰重哉晉天子異代之君李密通播之臣密尚得陳情養祖母今爺爺不容孫子陳情何也伏地痛哭吾亦泣姑允之淑人病亟孫哀號呼天計無所出割股肉為羹以進又嘗所出否及淑人卒孫哀毀踰禮既殯始應秋試不第回扶柩歸京師至吾家三千里冬寒孫露卧柩傍既葬虞祔祥禫考古禮行義服三年初吾自撫晉陽歸視嚮感癘疾坐于廳命孫召淑人語

對曰祖可入祖母不可出吾曰我病不能孫驚仆于地  
口鼻出血左右扶起入告淑人淑人聞其言見其狀亦  
驚仆孫出視其祖入視其祖母往來號呼不覺披髮徒  
跣淚血滿膺食頃吾蘇衆為束髮顏面孫曰真愈邪安  
我邪吾曰取粥來孫喜見顏面然痛定思痛淚下如雨  
紫陽弟曰今日遑遑惟士榮耳預營葬地於吾墓之側  
曰異日身後以便服勤於地下云已酉病不終殤庚戌  
病亟吾悲泣孫正色曰死生有命既而曰天下事未可

知借言死生尚未定止吾悲也至卒井井不亂嗚呼吾  
孫遽至是邪痛哉痛哉吾孫事父母孝而有道母不喜  
飲酒終身不近壺觴祀不飲福歷覽羣書尤精于蔡子  
壁經及朱子周易占于凡律歷天度樂器龜卜方藥之  
屬皆究其樞要遠識宏見出人意表有經理之才事無  
巨細處之能當其則沉機應變淵深莫測善用自牖遇  
巷之謀故行無不利而少沮逆然動必以理論必以正  
無或拂經焉吾意其必為國家宣力乃竟止于是也惜

哉惜哉吾孫生于嘉靖甲申六月初八日卒於嘉靖辛  
亥正月十一日得年二十有八配趙氏繼李氏男一可  
賢未聘女一字生員許三畏長子爾立銘曰吾孫既沒  
渭北趙先生以書來弔曰張子士林仰重德性閒雅漢  
之黃憲未或先焉哀傷之過宜有之矣讀斯言也吾孫  
庶自慰於地下乎悠悠蒼天謂之何哉胡奪爾年胡富  
爾才胡富爾才胡奪爾年謂之何哉悠悠蒼天

王安人墓誌銘

予迷提刑孫大夫王安人狀流涕閤筆者數四傷哉春風不見桃李實欲養而不逮古人所以深悲哀嘆也安人當王氏中哀以閨房弱質舉王氏一門烏獲之任憂勤勞悴年五十餘尚未亨利竟殞歿焉後十三年而子太守君崇古登大科又三年太守君以刑部主事蒙覃恩贈安人勅曰以孝睦為令婦以愛勞為慈母遺澤有加而榮養不逮良可悼也孫大夫曰綸綍煥然足光閭德謂非天錫之報耶古人謂天道雖悠遠而終不僭信

夫安人姓孫氏封刑部主事素菴王公元配也蒲清白著姓父諱某號坦菴時稱長者母王孺人安人生而閒慧柔嘉少與諸姊妹從孫姑馮孺人居靜默無競溫然自淑馮教以女工鍼縷纂組輒盡馮巧而又時或過之馮甚喜愛謂王孺人曰是兒幽良妙麗必為人家內則也長歸素菴公事翁姑孝處妯娌和視素菴弟妹若同胞翁敬齋公授鄧州訓導旅資不給安人脫簪珥充費奉姑張孺人同至任敬齋公遷魯山教諭兩任歷十二



年敬齋公有士望遠近樂于交遊素菴公日召工匠製  
器用安人既無妯娌又乏婢僕書則外應賓客樽俎工  
食內供翁姑羞膳夜則治諸子衣履備極苦辛張孺人  
每憐念之安人久益竭力故敬齋公得樂于冷宦素菴  
公得專意貨殖而安人疾作矣敬齋公致仕歸安人久  
違父母醫獲見益增悲感然無一言述其勞翁姑乃數  
數言之戚黨以贊其賢小姑景孺人少折遺孤甥方在  
抱姑素鍾愛小姑哭不已安人亦有女在抱取孤甥同

乳之而愛護有加以慰姑哀思家口既衆情性靡一又無蓄積素菴公經營四方每數年始一歸中間坎坷拂抑人所不堪安人順受之雖素菴公亦不盡聞素菴得以保和兄弟終始無間者安人內助有力焉敬齋公暮年多病損食安人每饗殮極其謹潔惟恐不當意聞少飯即喜動顏色張孺人久病痺不能舉手安人親為理髮足病瘡每痛發安人以手砥摩張孺人每對人言其孝勞輒至泣下父母相繼卒安人雖哀痛特甚而不廢

翁姑之禮翁姑相繼卒安人相素菴公襄事虞祔祥禫  
祀必馨潔安人痛姑之歿數謂嫂氏言每憶從事三十  
年間居家隨宦備極窘瘁輒咽噎不能語或夢姑呼其  
理髮痛哭失聲事素菴公終身順正素菴公亦禮重如  
賓性本勤儉樸素親課諸子讀書不令少逸有過必聲  
其狀責治之衣令蔽體食令充腸而已見家人溺愛者  
曰非兒女之福也諸女皆命先讀孝經曉其文義而後  
及女工中饋畜子婦特慈未嘗少令知勞每憂長子崇

義未嗣後育一孫疹發安人驚悸疾益而卒時太守君  
未冠諸女在閨素菴公又商于外親戚內外罔不悲嘆  
曰耕而未食蠶而未衣可哀也已安人生于成化丁酉  
十二月十九日酉時卒于嘉靖丁亥十二月二十六日  
未時享年五十二歲崇義等將以嘉靖辛亥十一月十  
二日啓安人之壙與素菴公合葬焉嗣世詳具素菴公  
誌茲不再書銘曰蒲有淑女君子儷之威如交愛式昭  
母儀一身之微當王氏哀劬勞盡瘁兮藥自持天道明

明爾嗣穀穀爾德孔那受天之祿王氏赫赫實爾之福  
爾積爾遺如岳如瀆食不三牲祀陳五鼎鶴表興悲龍  
章錫寵松楸蒼蒼高塚壘壘他年太史為寫宸碑

乾  
坤  
山  
澤  
巽  
兌  
離  
坎

苑洛集卷六

欽定四庫全書

集部  
苑洛集卷七

詳校官庶吉士<sub>臣</sub>李如筠

中書<sub>臣</sub>劉源溥覆勘

總校官原任中允<sub>臣</sub>王燕緒

校對官中書<sub>臣</sub>溫汝适

謄錄監生<sub>臣</sub>李傳燮

欽定四庫全書

苑洛集卷七

明 韓邦奇 撰

長蘆都轉運鹽使司運使進階嘉議大夫劉公墓

表

正德初聞代之陽有劉鐵漢者公也秉猷持憲直躬逆  
時獲罪權奸濱死無悔幸而人謀効義天神協靈得再  
生焉當是時也羣宦擅權瑾尤肆虐願指為皇制聲動



即天章喜愠回生死呼吸撼乾坤干心忤意則汗瀦宮  
牆希旨承顏則金紫嗣世迫脅海內燠煽朝廷文章之  
士牙籤錦軸頌德者盈几介冑之夫首功汗級呈勲者  
填門比當大賀之時適瑾有私家之慶公卿百執事嵩  
呼舞蹈於丹陛者十惟八九而稽首崩角於瑾前者則  
濟濟罔缺焉是何時也公何人也而與之抗昔東漢黨  
錮之禍如爐如鑊孔褒以投圭爭死皇甫規以無名耻  
生千載壯之皆成仁取義之志公無愧焉嗚呼可以表

其墓矣丙寅公總理遼東糧儲兼屯種瑾初擅權正急于貪或告瑾曰文官富有惟邊郎耳瑾明言指意而公弗從瑾怒械至京師枷號示衆時枷重法嚴晝夜監守雖親友莫敢近他枷者多十日餘即死獨公枷月餘不死時公同郡王沉庵者以死侍側日夕不離公曰我死其職分也如君何王終不去方枷時有黃冠者至公邸遺家人藥一丸曰日剝一分服之盡則難脫是日公夢仙人自霄而下以一丸藥納之口覺而口尚有藥香監守

者俱言見老人送藥忽不見於是喧聞九市上達朝堂而西麓張太宰乘此異言之瑾得釋為民後太宰又言宜起用以示公道遂授監察御史未幾而瑾敗朝野稱為鐵漢云若夫公幼而悟長而文持已之行正家之教範鄉之義涖官之政所當書者不具書而獨取公處死生大節彰彰於時者為世楷法云公諱繹字以成號斗山姓劉氏山西太原府代州西關人也登成化丁未費宏榜進士初授戶部主事歷郎中改監察御史陞河南

衛輝府知府陞長蘆都轉運鹽使司運使進階嘉議大夫云

前嘉議大夫都察院右副都御史九川呂公墓表

九川公飲恨而卒其友朝邑韓苑洛發其隱撫其大及取名士潘子高之論痛哭流涕長太息表其墓曰書曰善降祥又曰天難諶公關中即俊即宅之賢也懷安攘之志抱忠亮之節蘊貞懿之學秉廉介之操中遭震撼

放遺終身道遠而位促光已輝而弗續志士至今傷之  
公之撫遼陽也清屯田裁冗役嚴號令禁奸宄按豪雄  
料丁力將築邊墉以遏侵軼一二渠克魁罪懼將必當  
大法惑衆倡亂而公危矣初公以左布政起復入京故  
事必先補原職而後徐遷之先相以公國士也不可以  
常調拘陞副都御史巡撫遼東及變上近貴以先相故大  
怨誤以公為先相與因欲罪之憲使者又不為公申有  
詔收繫公詔獄使者至遼陽諸宄并使者笞辱之林侍

郎廷昂奉勅勘公事諸兇閉之憲使者出帑金大賚乃  
啟門且撫慰諸兇謂公必重坐蓋圖悅諸兇心隱其械  
詔使窘侍郎弗以聞而公果重坐遠戍憲使者以平定  
論功超遷矣公平生建立如何而枉罹橫尤若此祥邪  
非邪天邪果難諶邪然公議無泯時士林扼腕嘆息位  
雖褫而名弗損身雖屈而道則亨後公之嗣子光于科  
甲顯于庠序繩繩未艾擠公者今安在也天難諶邪非  
邪公今已矣傳於史冊罪也功也是邪非邪嗚呼可以

徵矣吾友潘子高曰正德間閹宦武夫相繼盜弄國柄  
生殺予奪順指氣使當其時勢摧威劫中外風靡士大  
夫依阿忍澠以保身全妻子鮮有能自立者公于時明  
目張膽數侃侃論天下事不置建儲保治諸疏讀之凜凜  
使人毛髮竦立疾風勁草狂瀾砥柱公之謂與大同數  
逆而失處諸鎮効尤焉為政者往往務為姑息不敢下  
一令伸一法遂使狂狡之卒裒兇鞠頑待釁而動養患  
貽戚至于今未已也公以身任其事務改絃而更張之

天若厭禍公得大行其道豈惟遼左永清卽大同諸鎮亦當警懾知有朝廷矣乃志未就而變卽作獨使公一人當之豈非天哉語有曰非常之元黎民懼焉及臻厥成天下宴如也人徒見公受禍之慘而未覩宴如之效乃併大同諸鎮事置不講藩鎮之鑿其不遠也已有志于天下者其無忽諸此乃公之隱而且大者也吾恐後世莫察其情焉故表而出之公之子南京刑部郎中顯再拜泣血登之石若公之詳載之誌銘不具書公諱經



字道夫號九川姓呂氏陝西慶陽府寧州人也起家進士授禮科給事中歷吏科都給事中調山西蒲州同知詔起陞山東布政司左叅政歷按察使左右布政陞都察院右副都御史公生于成化丙申十二月初八日卒于嘉靖甲辰十一月十五日享年六十九歲云

國子生西河趙子墓表

西河子諱瓘字汝完姓趙氏別號西河諸友以其周於文學呼為西河子關內馮翊之朝邑大慶關人也未弱

冠入為縣附學生以朱子詩屢應秋試補廩膳甫五年  
朝廷用輔臣議令天下郡縣選懷才抱德之士充歲貢  
西河子應例上春官遊國學歷部事天官考勤籍入仕  
版選期已屆而西河子卒矣其師尚書韓苑洛表其墓  
曰聖賢豈匏瓜哉傳說之版築膠鬲之魚鹽何其屑  
也古之人惟求得其本心初不拘於形迹生民之業無  
問崇卑無必清濁介在義利之間耳庠序之中誦習之  
際寧無義利之分耶市廛之上貨殖之際寧無義利之

分耶非法無言也非法無行也隱于干祿藉以沽名是  
誦習之際利在其中矣非其義也非其道也一介不以  
與人一介不以取人是貨殖之際義在其中矣利義之  
別亦心而已矣西河子之鄉萬餘家皆習商賈苦艱于  
息不益西河子笑曰何若是之艱哉吾聞之苑師曰馬  
援微時人不知名乃自表其能千金散而復積世有無  
用之儒者哉不數年起家數千金而人莫窺其所自也  
西河子文章典雅楷書深入顏室持已莊接人恭信而

無偽默而寡辭若拘迂之士而其通敏闊畧又如此可謂達矣孔子曰賜也達於從政乎何有漢司馬遷氏作史記述貨殖詳子貢事而深崇之是非喻于利也存魯之業在是矣使西河子得郡邑而治之廉魯之業豈多讓哉顧止于而已矣豈不深可惜哉其子邃勒之石邃雖不事典籍居喪如禮哀痛若弗能盡者西河子可謂不死云

贈中大夫光祿寺卿馬公墓表

公諱貴字尚賓以字行號靖川姓馬氏三原丁村人也  
正統癸亥公沒弘治甲子家宰端毅王公表其墓嘉靖  
癸巳以孫谿田子貴推恩贈官皇帝若曰處士貴光祿  
卿理之祖父也篤孝友于家庭化良善于里黨優游不  
仕人稱靖節之風授受有徒世仰河汾之化其贈中大  
夫光祿寺卿理者谿田子也谿田子思所以昭皇恩光  
先德也故再表其墓以文命予曾祖仕祿服田求志祖  
彥真膂力絕人能舉牛馬逾垣度險徙居王村元亂避

兵淳化山中卒全其家洪武四年天下大定乃返王村  
村人盡死於兵廬室盡燬乃徙丁村云祖妣徐孺人太  
原同知睦嚴先生女也父仲良仁讓謹飭口不言人過  
失與人交久而敬之處鄉里犯而不校嘗有野鴿羣集  
所居廬若忘機者將卒出末命一編皆篤厚親故鄰里  
之說子孫至今珍存云妣傅孺人生公予讀馬氏家史  
而知谿田子所以大也夫湍不急則淵不深畜不極則  
發不輝光馬氏自仕祿以來篤行可欲代為善人及公

則日新克實益弘世德使當時置之廊廟之間加之蒸  
民之上其施為建立豈不道光富有哉乃竟抑而莫伸  
隱沒岩穴乃今谿田子興焉急而淵畜而發孰謂非公  
所不盡哉請詳論公世而表其墓公幼而靈俊徐孺人  
教之學乃日夜誦讀太原遺書即能曉識大意家貧弗  
能時具紙筆常以荻畫地學書及長友同邑杜知府棠  
張教諭顯石處士彥華高處士銘切磋講輔考尋載籍  
上稽天文下測地理中極人事然未有指歸也一日徐

孺人語之曰吾聞之爾太原外府君道在中庸不必旁  
求也公悟遂專意中庸師處士敏深于中庸者也又相  
與研極中庸之理公南居丁村處士北居巷村間有石  
橋每相過講有遺論送各期于橋則止一夕自巷村歸  
論難不已不覺其曙也忽見行人過始別去鄉人因曰  
分襟橋久之於六籍兩間無弗見中庸而日以自學舉  
以教人者皆中庸也吉士解栖霞嘗就問退而嘆服贈  
公詩有公生質類顏淵之句一時學士大夫皆尊信之



公子中庸蓋手舞足蹈矣永樂中詔舉隱遺有司以公  
應詔不就公能用周易六壬皇極諸書占事知來皆奇  
驗事親孝父病藥不即功乃割股肉和羹以進疾遂愈  
時杜知府師處士皆親喪廬墓人稱三孝子云公生于  
洪武二十七年甲戌卒于正統八年癸亥年五十預知  
卒期語門人曰某日日入時大風吾歸矣果如期卒葬  
于丁村之僕頭田杜知府所相地也門弟子服心喪歲  
時拜掃其墓涇陽周銘者過墓必拜告所如還反面公

所著有語錄一卷周易雜占一卷中庸講義一卷配張  
淑人古有恒言探數原者鬼忌泄天機者神嫉由漢以  
來京翼李郭之流皆能察兆知先洞照今古禎祥妖孽  
毛髮莫逃然卒不能自有其身嚴君平邵堯夫蓋能將  
之以德則鬼神之道自我出矣如公者方且慶延嗣世  
綿綿無窮豈特身安而德尊也哉御史大夫何栢齋謂  
當與君平堯夫同傳信矣予又謂中庸之旨原誠明于  
天道致精于一于人心其極至于位天地育萬物公能升

其堂而窺其大焉雖與程朱之徒同傳亦可也益見谿田子之興源流深長矣

奉政大夫承天府同知許公墓表

公弘治甲子舉人歷任承天府同知卒于官父拙庵翁與我先君同登成化戊戌進士公又我省試同年蓋世好也乃為之表其墓公諱世昌字順德號東崖姓許氏陝之澄城人拙庵翁諱英歷官至刑部郎中母楊太宜人公幼孤鮮兄弟伯叔既長勵志勤學比登鄉試尤日

孳孳屢試南宮竟不第以太宜人老謁選吏部授太和知縣迎母就養知縣七年太和大治為諸邑最都院使院使奏書旌之章凡五上省平章行御史臺諸司下檄獎之者三十二于是拙庵翁贈奉議大夫楊太宜人亦獲封嘉靖乙酉轉開封府判捕盜不朞年地方寧謐院使又旌之丁亥陞順慶府同知起程日汴父老遮道拜送抵順慶適廣安賊勢猖獗殺官吏攻城甚急公領民兵直抵廣安圍乃解蜀穀不熟而廣安饑尤甚死散者

甚衆公夙夜圖賑救之策賴以活者千計民乏種及牛具公告于當道給種買牛而荒蕪闢矣府素苦水城屢崩民且歲苦修役院使者召公圖之乃開渠西山以泄水而患息院使大加稱重命立石紀其功委署涪州小河一帶盜賊蜂起公奉檄勦平都院使設太平宴以勞之且上其功賞白金二十兩公念太宜人年高蜀道險遠不能迎養懇疏陳情終養及太宜人病公奉湯藥夜不解衣及卒哀毀踰禮三年不越戶限服既闋且皇皇

然如新喪復除承天府公益勵清操盡心職務車駕南  
巡公適署府事百責艱大夙夜奔勞至于昏斃復蘇者  
幾時又改修陵寢開築城池建立觀廟添設司衛皆取  
辦于府兩院使方列牘共薦而公因勞邁疾不起矣兩  
院使諸司憫公廉貧卒于王事各給傳騎送抵家公生  
于成化戊戌三月十五日卒于嘉靖庚子四月三十日  
享年六十三歲公姿容秀整沉毅敏達強學修行衆方  
以大科顯仕望之及入仕前後旌獎幾四十章而竟止

金少府人公三  
卷七  
于是固南宮失選銓曹論格也而其享年亦竟止下  
壽夭亦不可恃與謂之何哉

提督操江南京後軍都督府都督僉事陳公墓  
表

正德甲戌余以按察僉事巡兩浙公正位浙閩蓋始識  
公別公二十年而公卒又十五年余叅贊南京機務公  
孫府學生應龍來問表蓋公治命也公謹重周詳內機  
智而外溫醇與人交夷險通塞不易其初蓋士大夫多

好公而公亦聲稱籍甚官至樞府榮封三世云公諱璠  
字汝玉號思古浙江湖州府安吉之荆溪鄉人高祖諱  
興洪武初實授百戶没于陣曾祖諱翼蓋白溝功陞都  
督同知祖諱文襲金吾右衛指揮同知改温州衛正統  
間蓋平鄧寇功陞浙江都司都指揮僉事父諱綱襲指  
揮同知貌偉才達人謂可繼白溝之爵乃年強仕即殞  
歿成化丁未公嗣職年甫十七也掌衛事蓋十八年而  
溫衛稱振舉弘治甲子以都指揮體統行事總浙江糧



運乙丑武皇繼統推恩授署都指揮僉事丁卯總理屯局庚午揚州等處備倭寇衛有缺官俸鈔及歲入餘利向涖事者盖多入私家公盡籍為公費又查革冒濫軍糧歲計盖四千八百餘石壬申流賊猖獗公為統帥時武弁多濫及無告者為功次有邏卒誤獲防守卒六人喜報公立辯釋之癸酉推浙江都司軍政掌印丁丑實授都指揮僉事盖錄孝豐湯毛九功巳卯充叅將協同漕運尋有宸濠之變奉勅符旗牌關防不妨運事鎮蘇

松常鎮四府地方公既受命查革冗濫歲省軍儲蓋萬  
五百餘石復查局不事事者當之罪初公領部檄調集  
兵馬聽候迎駕及是宸濠就擒上受賀班師大燕公與  
馬有文幣白金牌花之賜太倉鎮海嘉興三衛軍餘四  
百名貼守金山衛蔡廟港崇明所軍人五百名防守潭  
子港皆支行糧然潭子港已坍入江軍猶影射支糧蔡  
廟港附近衛城公皆議革罷每歲省糧蓋三千五百四  
十石嘉靖壬午推南京大教場坐營丁亥改團營果敢

營坐營尋奉勅充叅將通州駐劄驗給官銀兼修河道  
省車脚餘銀蓋二十四萬有奇解戶部發太倉收貯陞  
俸一級兼賜文幣辛卯陞授署都督僉事南京後府僉  
書壬辰奉勅不妨府事提督操江兼理巡捕公以江防  
重務舊無符驗關防不便行事疏請允給推恩實授都  
督僉事追贈祖父如其官甲午春三月公卒賜葬于永  
嘉宋萬山之原祭一壇云

叔祖考武清縣知縣墓表

越惟成化之末中幸持權汪直梁昉威勢傾宇內寵貴  
震朝廷公卿長跪稽首奉命唯謹頡頏振瑾雖永銳而  
下不論也畿邑武清軍屯皇庄徧四境最稱難治我叔  
祖美髯豐面身長玉立動止儼雅器度莊偉天官卿簡  
畀而尹之時昉牧馬斯地為害百端叔祖不為應付昉  
怒縛里正懸高杆以示之曰知縣豈不見此叔祖乃擒  
昉頭目者亦杆而懸之曰釋里正則釋頭目矣昉不得  
已釋之昉至京言叔祖不稱武清遂罷歸自是杜門不

出縣尹以禮致之不能子堂叔繼宗適應里正役尹故  
苦里正以為叔祖必可致乃曰彼縣官自苦里正於我  
何預焉竟不見後尹愧悔言之分守車平章平章曰尹  
差矣致賢豈以威力哉率尹踵門請數次始一見示初  
我先君兄子也生而孤表伯李公貞姊子也少失母叔  
祖躬撫教之先君登進士貞亦中鄉試先君諱紹宗官  
至按察司副使封中憲大夫贈通議大夫右副都御史  
云叔祖性介直執義蹈矩動以禮檢見子姪亦具大衣

庶幾可謂幽獨無愧影衾言不妄發色不假人見世之  
多文飾者則以為詐云近世評品人物類以膚敏為高  
下歷觀前古興衰撥亂類非脂韋智巧之人所能堪叔  
祖侃侃諤諤終於放逸夫豈有所不足哉大學謂家齊  
而後國治我叔祖藏居田里成教於家我先君表伯孤  
哀無告者也皆至成立今我韓氏聯翩科甲衣冠濟濟  
皆我叔祖之餘也使其授之以政作人之效豈不至于  
大行哉顧泯泯而沒世莫得而述焉漢之張綱李膺豈

不能翊贊皇猷澤潤生民直方之不能行從古皆然也  
即其所至家人威如之吉矣惟晉五允升上合豈不難  
哉豈不難哉叔祖諱倫字秉彝天順七年以蔡沉書鄉  
試中式云

裕菴處士曹縣紀君墓表

紀氏之先田不滿三百畝及處士之身有田三千粟萬  
石金千斤曹稱大家惟紀氏處士曰吾苟富矣夫富務  
施不施則人怨富務與不與則力孤富務恭不恭則衆

嫉人怨衆嫉力孤而且富禍之媒也家之索也將如富  
何經曰富而禮天祐之吾將祈天焉於是積義儲以資  
婚喪建瓜室以待疾病設途爨以濟行旅而懷之者多  
上交官府貴人下結州閭豪傑而翼之者衆內修宗族  
外禮鄉賓而愛之者溥懷多則譽發矣翼衆則勢順矣  
愛溥則行達矣處士曰吾往利矣是歲也麥兩穗瓜兩  
葉牛兩犢馬兩駒而財貨倍入焉於是處士曰吾修之  
人而得之天矣行弗可怠也福弗可恃也乃修堰張河



葺青華開元二寺焚負券賑窮乏捐數百緡焉壬申之  
變流賊劉七入于曹圍處士不忍害惟求名馬處士弗  
與或曰賊勢淫矣郡縣且不能支也君族危在旦夕奈  
何惜馬哉處士曰賊干紀而命旺夫助賊殺人非仁也  
資馬為亂非法也旺則焉敢賊怒焚其居君子曰吾以  
處士惠人也乃知義矣處士諱旺字恭明別號裕菴山  
東曹縣人也生于永樂十七年正月二十八日卒于正  
德八年七月十二日享年七十四歲朝邑縣丞子年書

之石以表公墓

文林郎四川道監察御史嚴君墓表

嘉靖己酉十一月十九日君卒于京邸既歸葬越明年十二月君弟殿試天祐請表其墓先是君抵子書曰疾勢留連啟候緣疎予以為無藥恙耳訃聞悲嘆累日夫造化之不齊將安問也以君所負應止于是耶嗚呼傷哉君諱天祥字叔善號雙洲姓嚴氏吾關內馮翊之朝邑望仙觀人也嚴氏之先唐嚴思善之後世居長春之

西原思善初諱謨後以字行或曰唐有梓人節度使嚴  
譔賊私狼籍得罪誅而節度從祖震又封馮翊郡王史  
氏重思善厚德避謨嫌稱以字思善有大節善推占武  
后時來周峻法思善獨尚寬平全活者甚衆來周疾之  
謫交趾後稍遷至著作佐郎兼太史令官至禮部侍郎  
子向為鳳翔尹今西原有思善墓祠云向曾孫諱威遷  
望仙觀父諱堯黼母李孺人君生而靈異穎悟過人八  
歲能熟誦大學論語即通大義邑侯邵君循良吏也素

重人才見君大加竒賞厚遺之十二入縣學受學於叔父堯黻君講習經書至忘寢食而堯黻君又俊乂士也君盡得其學堯黻君又以渭北趙永州之賢命君從之遊是夜永州有竒夢焉歲試兩魁諸生僉憲開州劉君珂有精鑒得君卷曰嚴生國士也於是遠近無不推先嚴生者本僉憲賞識之力也庚子中陝西鄉試第六刻經義為多士程甲辰登秦鳴雷榜進士觀政刑部授絳縣知縣期年而絳治人知向化野無盜賊案無停積獄

幾空虛有兇犯毆傷人股致死者累檢傷股人骨無他  
君取二股骨察其形色長短新舊不同大訊之兇犯具  
服蓋更忤受兇犯賄潛以他人枯骨易之寡母告子不  
孝君廉得母與僧姦狀憐而釋之亦不治母曰子母之  
際難言也撫按有疑獄輒以付君惟明克允君之治絳  
也不以刑罰為威而以廉故不苛而豪猾畏不以賑費  
為惠而以靖故不擾而民衆懷不以戒令為期而以信  
故不勞而庶績熙而君又敏達勤慎故並其有土厥鄰

環三晉而郡縣者七十餘絳縣治行第一撫按共聞于  
朝戊申徵拜四川道試監察御史明年實授未幾疾作  
彌留卒遡君生于正德甲戌某月某日至卒得年三十  
有六君性孝友五六歲時每遇美果食必先奉母既長  
朝夕惟以承歡父母為念母病泣跪進食呼天而禱父  
落一齒持之泣累日嘗因事諫父父怒以履踏其面笑  
而受之父乃感悟天祐多病飲食湯藥必親嘗之學每  
有所得必以語天祐居鄉謙謹重法禮鄉人愛之及為

御史遺書家人曰凡居鄉必順天理合人情毋挾勢凌物利已損人常以天字安在眉頭行無不利矣初絳平陽富邑君三年間俸薪外分毫無取去絳時僚屬士民爭以進饋皆不受曰取予士人之大節豈以在絳去絳而遷其守乎昔兩漢取士以孝廉為首成周效邦君養恬為先夷視君履居身之珍治絳之美兩無所歎云

清軒處士富平紀公墓表

公諱鶴字霄鶴號清軒言鶴唳清也世為西安富平蓋

村里人沒已久矣曾孫道將於嘉靖十八年十一月初三日舉二代之喪而葬焉道子門牆士也請表其墓昔三代盛時德藝兼用下及兩漢猶存一二廉叔度以家僕存主孤遂舉民牧治行稱平民安頌作傳列青史名垂千古藝何有焉近代專較文藝是故篤行之士泯沒遁世矣聞公事親孝養生送死固不以禮哭母終而喪明勤父疾而傷生其處兄弟之間尤為恭友析產自取其薄饒沃歸於兄弟撫育族孤有室成業至于捐粟以



濟歲凶糶粥以活餓殍則又行義施於鄉黨者也若公者得不謂之篤行之士哉俾寄之百里之命即無赫奕之聲其視世之取高科司郡邑貪黷肆賊機械巧中誘惡傾善欺上毒下蕩然無復廉恥者遠矣然竟泯沒遁世焉公生于正統元年三月初三日卒於成化二十年八月初四日得年四十有九配趙孺人子男一女一孫男四曾孫男八女八玄孫男七女四公惠人也身儕於齊民壽甫過五十人謂天道亦無知矣今觀公狀子子

孫孫繩繩衆多間有聞人孰謂天道果無知哉

堂弟縣學生韓汝聰墓表

華木千葉者多不實靈駒千里者多難牧天地有憾造化靡齊人亦莫得而詰也痛哉吾汝聰弟多才而位弗偶資秀而嗣弗續且不以中壽已矣嗚呼痛哉汝聰諱邦達字汝聰陝之西安朝邑之南陽人也我韓氏本慶陽府安化縣人宋元以來世以武貴至元中葉以金牌萬戶鎮蒲關關今隸朝邑又數世卜壠於邑南馬坊頭

規模宏碩松栢十數種種皆百株隴外供祭田百畝吳  
彥常者世佃其田取租每歲清明辦牲品餘租供族之  
生員後稍稍為田隣侵而吳亦陰賣之正德中乃計見  
田三十七畝與彥常姪雄為符書供租如故事初洪武  
初髯祖者始罷武階為齊民亡入洛南縣家史失其名  
但相傳髯祖云後念朝邑隴在焉携長子平輔祖歸朝  
邑留餘子於洛南今其族亦甚繁盛云又四世至祖顯  
奉政大夫刑部郎中贈通議大夫都察院右副都御史

配張淑人初封太安人繼封太宜人贈淑人旌表節婦  
生伯父珏義官伯母白孺人生汝聰少穎敏美姿容先  
中憲府君愛之取為子以蔡沉書補縣學廩膳生後伯  
父以余兄弟四人俱登名仕版伯父八子獨汝聰乃復  
取回子之初汝聰赴同州歲試伯父偶得暴疾急召汝  
聰歸已易箒不能言汝聰號哭計無所出跪吮伯父喉  
中痰出乃張目一視曰汝歸矣遂卒汝聰謙讓能忍納  
交時豪門多長者車轍然嚴毅有智畧人多畏而不敢

犯里中有爭皆赴愬多不之官一判則人不敢再辭再辭則傾財助直者必令勝白孺人之喪遠近賢傑無弗弔送者宗人以為吾韓氏駕海之梁云生于弘治庚戌七月十七日卒于嘉靖甲辰八月初七日享年五十四歲先以嘉靖二十三年十一月二十五日葬于新阡縣南西原之上因畧擬其世系行實梗槩表其墓云

故蒲城雷公墓表

公既卒子介一行人既自為誌納諸幽壙矣嘉靖壬寅

介一卒孫縣學生洵溥子門牆友也將葬介一請文以表公墓公諱太初字本仁姓雷氏世為陝之西安蒲城人今聖天子龍飛改元誕恩公以壽官公幼淳謹以孝恭聞讀書僅能紀家務性狷介寡合故異趨者頗不悅而同道者則愛重之慎取與畏法義見非分之物必懼焉若浼成化初西邊用兵官府給金購糴寬限以召商人爭趨之公獨不領金衆曰值高限遠奇貨可居也奈何弗取公不答逾年徵糴以年之稔也倍其數且輸之

邊死徙者殆百家後部糧甘肅衆以官值易市冀規厚利公獨齎本色同行者笑其拙抵肅而兵殷用急部使者比杖日且二三四邊一時不能貿易有司督併妻子捶楚無完膚至破家以償一日味爽偕同里數人適野途中偶坐者見來疑其捕已也不暇取所携走見遺金一袋衆競分之公獨不取且曰異哉亡金客見諸君分金而弗顧恐有他故且非分之物得之不祥越月監司獲盜諸分金者皆為盜指誣而被刦家又皆識其為家

金也竟無以自白斃於獄正德中縣侯劉東岡大謨以御史謫循良尹也以公負鄉望辟為鄉飲賓不就劉親身至其第卒亦不赴劉甚高之平生凡與鄉人論談每以力田教子守分為先家政外則課子讀書泊然靜處而已公生于正統六年辛酉閏十一月二十六日卒于嘉靖十三年甲午六月初四日享年九十有四子兩所謂介一也正德甲戌舉進士為行人司副以縣令致仕朱子曰求利未得而害已隨之惟仁義則未嘗不利也



公不領糴金不買官金不分遺金人皆嗤其愚也卒之衆皆亡身破家而公獨安樂焉信利義之相去遠矣因詳書以表公墓為世之貪利而不思害者之鑑云

贈文林郎河津縣知縣逸恬樊公墓表

公歿且二十有六年矣子得仁以監察御史擢四川行省叅知政事將表其墓以文問予予觀樊氏世德知樊氏之必興也予迨交公公精神秀爽資性聰敏心意豁如也田園廬室苟合苟完不戚戚以求美不妬勝不曲

狗苟志同情適暢飲終日若遺棄生事者得仁則剛毅  
而通達浚明而仁厚久要不忘有古人風尹河津按直  
隸民懷士頌聲望卓然故觀公則知今日有得仁觀得  
仁則知樊氏之大將不止今日矣公諱勛字功甫號逸  
恬馮翊朝邑之北石村人也以得仁為河津時贈文林  
郎河津縣知縣父清齋公為榮縣典史時川蜀盜起清  
齋公部餉松茂病甚公代領卒事為諸郡邑先榮尹下  
堂迎勞上官以詩對旌之會清齋公入覲至湯陰寒病

不汗公解衣溫抱如是三日猶不汗且不食夜夢老翁  
曰是病得艾愈乃迎艾醫分痛灸病果愈其事母嚴王  
楊繼母望仙楊皆以孝聞公雖不卒學然曉識大義初  
成化乙巳歲大饑清齋公欲公以例入監公辭曰一子  
侍養典章也才自貴顯者尚乞歸况以粟易官為邪  
且迎伯父義及諸從兄弟就食於榮又樊朗者伯父遺  
腹子也清齋公撫至成立畀之婚室田業公亦體父志  
友愛之冬月鄉人有寒者公解衣衣之其人請計值後

償公曰勛賣衣者邪配楊孺人亦以得仁官封云

四川瀘州吏目屈君墓表

君諱泰字道隆姓屈氏本楚公族也漢高帝徙齊楚豪傑於關中遂為華陰人世居義合里祖諱韶縣學生入太學祭酒司馬公詢合六館試之每魁多士謁選吏部授山西隰州同知有仁政祖妣李孺人考諱弘仁以君兄都御史西溪先生官刑部時封員外郎天性淳雅言行不苟曰朱子我師也吾大者弗能乃弗能遵小學耶

楷書道勁類歐陽詢仗義輕財愛人謙已鄉人式焉妣  
李宜人亦以西溪先生贈君生八月而李宜人卒育于  
李孺人同知公既守廉不苟取比謝事歸又適成化乙  
巳之荒西溪先生已為學生君力田供養父兄弗暇業  
儒稍裕則長矣就吏一考嘆曰吾家世以儒而吾以胥  
史何為者哉不赴調縣尹謁同知公勸之進後授河南  
永城縣典史署縣事時西溪先生督撫淮揚縣里正懼  
君依勢為威多歛銀麥餽之君皆叱却正旦各里循故

事具白金為節儀弗容進一人偽言叅稟入于堂擲金於地疾馳去君追還付之流賊猖獗撫司發銀千兩為軍需君與暢進吏者方易其半賊至城陷盡焚之吏謀曰既焚無稽餘銀五百若通纂入完案誰則知之君厲色曰國家多艱又因以為利即子孫乞於市亦不為此縣有國戚二張素橫遠近趨媚君獨弗禮家衆大不平欲辱之一人曰渠西人素剛安肯甘受則損威多事矣幸庵彭公總制河南知君檄供事軍門屢獲功賞總制

凱還論功奏陞四川瀘州吏目欽賞白金緞疋羊酒瀘  
蜀大郡也憲司治焉民俗好訟憲司有難決事輒下君  
後巡撫大臣行瀘稅多欠下君典徵事民素畏君皆完  
大桀某收侵數千石君廉實某懼懷二百金求免君不  
聽竟置於理時營建宮室採大木千餘章巡撫及採木  
司空選能幹官解木君與馬水手解戶千餘人往返日  
費總萬餘咸君主支無纖毫不明瀘之分界居民倚兩  
郡影射尤習刁悍官亦弗能禁君嘗蒞槐牙鎮鎮分界

處也有囂民立公側言詞悖慢問之曰富順民也究之實瀘民百餘人持械器謀至君呈兵司治以法自是無梗民矣庚辰春思封公年高致仕歸家居十餘年安分自律非公事不入城郭君居官十年餘里居十年餘業業謹篤如一日可謂難得也已公生于成化三年十一月初四日卒于嘉靖十二年五月二十九日享年六十九有七瀘士吳子莫曰屈南衙不好士人獨與子莫善因飲從容叩之南衙曰泰行素為士人輕動曰胥史也泰



仰之若天日及泰遊歷四方見官于郡縣者貪殘巧中  
教奸詆善發財黷貨動以萬計民有一怨言立亡身破  
家剝民之脂膏以媚權貴賢人君子無如我何者百計  
凌之以張已威類皆士人也泰又心疑之子莫不覺擊  
几長嘆曰若此者視南衙取與不苟強禦不畏也奚啻  
溷廁哉君子縣學生徵請以表其墓

湖廣高竅巡檢司巡檢贈文林郎山西襄陵縣知

縣尚公墓表

正德丙子六月十八日公卒塋淺土越三十餘年嘉靖  
辛亥二月二十六日公子主事君薰等葬公于縣東高  
原祖塋之左朝邑韓苑洛表其墓曰北條之水有長河  
西合於崑崙東分為九河九曲圜乎華夷北之水惟河  
為大也南條之水有長江上連乎洞庭下會于彭蠡一  
水限乎南北南之水惟江為大也人見河之大則仰思  
星宿之海人見江之大則仰思岷陽之泉納漢沔受蘭  
賓萬流奔趨邈流而源汪洋澎湃可知矣使河非星海

則行潦耳將朝盈而夕涸使江非岷泉則雨集耳將秋澤而春乾安能其大若是乎傳以顯揚為孝之大者非以其子之賢可以蓋前人之過愆非以其子之貴可以榮前人之封號潛德幽行前人冥冥之仁因是而可徵也古之人三公奕世揚氏放雀之仁著矣九卿顯名于氏治獄之仁著矣公雖歿矣公之嗣子若蘭若薰若芳聯翩仕籍而薰以進士為部屬芳以鄉舉為縣令二君才名濟濟異日崇階大拜未可量也非公陰德之隆何

以致是夫陰者人不得而知也若顯德著聞或以名彰  
或以位貴或以祿富身積其德身受其報非陰也必蓄  
德盈缶泯然無聞於終世然後不盡之福衍及後人而  
前之善始著焉公位不過下士祿不過代耕名不過見  
知於閭里使非二君亦曠野蕭然一荒塚耳故觀公者  
當觀於崑崙九河洞庭彭蠡以邈於星宿之海岷陽之  
泉可也若公居官而守官箴居鄉而篤鄉誼居家而肅  
家政如狀之所列人之所知者特沱潛既道灘汭支流

耳不足以盡公也易曰積善之家必有餘慶蓋以子孫之慶歸前人之善焉公諱達字伯通姓尚氏關內西安之武功人以掾士授山東青州府永阜倉大使改授義河馬房草廠大使改授湖廣高竅鎮巡檢司巡檢以薰襄陵縣知縣三年考績贈公如其官生于正統乙丑六月初五日卒于正德丙子七月十八日享年七十二歲云

大中大夫陝西布政司右叅政北澗王公

墓表

公道富而施不既職舉而位不究行脩而人不知中遭  
毀阻放逸沒世寒泉弗汲君子心惻焉於是尚書韓苑  
洛表其墓曰夫登山者不必至其巔但峯巒翠抱有花  
有竹有松有栢可息可亭即勝地也涉泉者不必至其  
源但瀦匯清深有荷有菱有蝦有魚可舟可釣即佳境  
也登仕版者位無崇卑克宅為賢職無小大就列為稱  
公始稽鈔關繼監允運會計稱當習盡剔督理邊餉

出納惟允芻糧充足三軍感悅當其時節鎮大臣至與  
之商確邊機謀議撫政而元戎叅佐莫不稱嘆敬服其  
浚明亮采溢於常職之外又如此此其主事員外郎中  
舉職于部屬者也自郎中進叅議分守關西開司平涼  
平涼多宗室且驕橫凌轢官府侵虐小民公均祿糧以  
治其本根刑撥置以翦其羽翼眷比附者連坐以法  
由是豪強斂跡官民不擾胡店有劇寇大肆劫掠公擒  
其渠魁釋其脅從地方以寧撫臣上其事天子嘉其功

金幣羊酒均錫馬由叅議進副使振揚風紀一道澄清  
乃承祖母之重繼接祖父之喪哭奠殯窆必誠必信虞  
祔祥禫一遵古禮起復河南尋進叅政整理驛傳關內  
稱平而公罷歸矣此其歷藩臬而舉職于外臺者也使  
其進節鎮陟卿相則其贊襄陳力豈不如今日哉彼負  
重而棟橈實美而鼎折一縑之外失足則隕百泓之中  
逼視則陷又惡用登蓮華之峯問崑崙之西哉夫鈔關  
監兌皆貨利之所藩叅臬副皆顯要之官至於大同邊



郎羨餘每巨萬而開中招買之利動輒不貲公始終永  
玉自持無毫髮誣染又常以士廉女潔一虧終玷訓其  
諸弟姪則其自處可知矣而當道以簞簋不飾論罷公  
官夫瓠巴鼓瑟至感流魚奏之王門誰為之聽故卞氏  
之璧徒抱泣于中野而已士之見知古今為難人不知  
公豈足異哉雖然方田王公之狀南澗楊公之誌歷歷  
可述漁石唐公謂之中流砥柱異時觀風者采之布之  
天下傳之後世孰謂人果不知公哉昔貞晦先生沒世

而名不稱唐儒申之曰天至高而卑聽鬼神至幽而明  
聽天知之鬼神知之何謂名不稱哉嘗聞之水深而波  
易動木高而風易搖方田謂公方正自持不習諂媚是  
故有以招之矣然合抱之良蛟龍之生胡損焉公姓王  
氏諱納言字允忠號北澗山東淄川人正德丁丑進士  
孤時思時錫登之石

文林郎長壽縣知縣贈承德郎工部虞衡清吏司  
主事趙先生墓表

先生卒且三十餘年矣嘉靖壬子子永州太守渭北公  
粵若稽古撰述懿行請吾友四川行省少平章渭野樊  
子為之狀叅贊尚書苑洛韓子童時習知先生素履狀  
又實錄也于是表其墓曰士君子胸懷脫落而無所閉  
藏資性淳懿而恥為機械制行坦夷而不為隱怪此居  
身昌後之道希賢進德之基也今觀樊平章所述疊疊  
千餘言凡先生生而家士而庠出而官處而鄉平考無  
遺大率若此所謂脫落淳懿坦夷者皆先生之所長閉

藏機械隱怪皆先生之所恥也世固有雄才宏畧談笑以揮天下之事而胷藏險陂又其有高視闊步問學自修托跡于孔孟而內實荏汚人見其飾功揚名登榮陟顯或者峻視于先生而不知皆先生之罪人也先生以是而孝于親以是而友于兄弟以是而尊賢取友以是而敦本崇質立教于延津以是而省刑薄歛敷治于長壽以是而周貧濟急敦睦于鄉閭是故父母安之兄弟友之朋友與之學日光大教日弘敷民日感懷鄉閭敬

而慕之矣以先生之實則雖有服大僚可也乃位不過  
郎官名不過鄉士人謂善無徵也而渭北公通達明敏  
強學飭躬服先生之教益弘其業登名鄉試賜第黃甲  
官部屬終郡守宦跡所至卓有令聞而先生以渭北公  
官工部時贈承德郎虞衡清吏司主事然後士君子之  
報始伸而先生之心慰矣先生諱龍字虞臣己酉鄉試  
中式授河南延津縣教諭陞四川長壽縣知縣配仇安  
人渭北公諱儒字席珍號渭北云



苑洛集卷七